



INATSIARTUNI

Partii Inuit
Randi Broberg

UPA 2014/158-1
10.4.2014

Inuusuttut inersimasullu innarluutillit atuartinneqarnissaannut, ilinniagaqalernissaannut suliffeqarnissaannullu kommunit inatsisit atuuttut naapertorlugit sunik pisussaaffeqarnerannik Naalakkersuisut erseqqissaassuteqaqqullugit Inatsisartut aalajangiiffigisassaattut siunnersuut.

(Inatsisartunut ilaasortaq Agathe Fontain, Inuit Ataqtigiit)

Nunatta aaqqissuussaanerani pingaarnersiuiernerput ukiorpassuarni unnersiutissaanngilaq. Namminersuleralarattaluunniit nammineq immitsinnut pingaarnertulluta ineriartortitsiviginissarput aallutinngingaratsigu, allaat sanngiinnerusortagut katangarlugit ingerlarsornitta tassa ilaatigut kinguneri maanna takussutissaasut, soorlu innarluutillit atugaat eqqarsaatigiinnarlugit.

Innarluutillit suusupagineqarlutik allaat kingullinnguutsinneqartuarneri takujalerpagut, tamannalu akuerineqarsinnaanngilaq akisussaaqquseqanngittuliornerullunilu oqartussat tungaanninngaanniit.

Taamaammat pingaaruteqarluinnarpoq, suliniutit imaattut pimoorulluinnarlugit timitalerneqarnissaat.

Innarluutillit inuiaqatigiinni peqataasutut naleqartutut tusaaneqartutullu misiginissaat piffissanngorpoq.

Taamaattumillu Partii Inuit taama naattumik oqaaseqarluta siunnersuuteqartoq qujaffigaarput, ingerlatseqatigiiffiillu (kommunet) pisussaaffimminnik eqqortitsinissaannik erseqqissaavigineqaqqullugit siunnersuutaa taparserlutigu.

Tassungali atasumik aamma Partii Inuit pingaartipparput, ullumikkut annertuumik innarluutillit kiffartuunneqarneranni akisussaaffiup ingerlatseqatigiiffinnut (kommunenut) nuunneqarneraniilli misilittakkat suunersut paasissallutigu.

Minnerunngitsumik Partii Inuit soqutiginarillutigu, ingerlatseqatigiiffiit (kommunet) kiffartuussinermi pineqartumi kivitsisinnaanermikkut qanoq atugaqarnersut.